

皇明經世文編

皇明經世文編卷之四百四十三

陳子龍臥子 徐孚遠闇公
華亭 編輯

宋徵璧上木 徐鳳彩聖期

卽墨黃 坦叅閱

薛恭敏公奏疏

疏

薛三才

議築寧前錦義廣寧開鐵等處敵臺疏

遼左敵臺

議照遼左南面濱海三面瀕虜曾無折柳樊圃之隔而寧前一線爲全鎮咽喉錦義僻在西北毳帳鷄犬

相聞廣寧遼海居民稍密素爲虜所垂涎之地開鐵
遠在東北孤懸天末三岔河蜿蜒其中東南千餘里
之間五七十萬虜蜂屯蟻聚如奴酋叵測日圖奸睡
于臥榻之側而愁抄宰煖昂乃等酋朝欵而夕叛西
受賞而東犯搶日盤據而窺我門庭加之山路崎嶇
林木障蔽在彼則易于掩伏在我則難于哨瞭往往
二五十騎一二百騎潛形竊入或撲捉墩夜或搶掠
耕耘如鷹鷂之擊鳥雀無日無有至其擁衆大舉豕
奔狼突隨處皆可闖入比烽傳羽報防援之兵張皇

馳至而賊已退矣。及兵去而賊又來矣。是賊得多方
誤我之謀。我犯無所不備之戒。邊長而兵益寡。備多
而力益分。益分益弱。益勞益疲。不待交鋒而敗形已
見。故頻年失利。不啻覆軍殞將。而寧前錦義遼瀋一
帶。居人殺虜幾空。此皆緣無障可乘。無要可扼。故羣
虜出沒無常。以致地方受禍之慘。至此極也。先該前
按臣張五典。撫臣張濤。俱議修遼鎮邊牆。該部議覆
先以原有二十萬金。漸次興工。今撫臣議建敵樓四
十八座。俱于城堡不及之地。虜賊出入之衝。四面皆

有圍牆內仍蓋有房屋與薊門敵樓規制微有不同
依然一小城堡居常則屯軍一隊有警則屯軍三四
百多置火器烽烟相望壁壘相聯卽有零竊可以躡
而走也大舉可以夾而擊也耕耘可以趨而避也一
勞永逸事省功倍防邊亦無逾于此者又自海州一
堵牆起至三岔河止議築邊牆五十二里撫臣六月
間親閱其工程已完十餘里高堅儘足捍虜此役成
而長城半壁海蓋地方庶可免冰結蹂躪之患使遼
瀋開原踵而築之勿責近效每年量修三五百丈十

年後可成金湯千里未必非百年之利也然而時諠未可輕議也又東州等六堡逼近奴巢向因承平日久俱殘壞塌倒不能關犬豕今奴酋反側未定宜乘暇俱用輓包砌以障衛居民且使奴酋聞之知我內備在在戒嚴寧敢復狎而起戎心乎

勘明山後失事併陳滿旦停賞始末疏

滿旦停賞始末

劉鎮密迓京師疎論易勝恭敏在鎮諸虜挾賞聚

夫餉事亦難言矣正爲密邇輦下風鶴易驚諸弁第

不當有廷臣不察情事乃有餉門近多虜警之旨

與幸目前無事奉虜如驕子隨挾隨加惟恐不及諸

酋習知我之怯虜而諱戰也尋事挾賞亦日甚一日

卽如滿口一支。薊鎮舊未有賞。其夫趙免西虜也。係屬夷伯彥打賴外甥。嘗往來薊門邊外。垂涎此賞。行打賴物。故遂憑陵其子女。挾奪其賞物。且撲殺我軍丁。萬曆十年白馬一關。遂加賞物八百餘兩。此濫觴之始也。自此屢挾屢加。每加輒數百兩。至三十二年。該關共加至四千餘兩矣。而大水黑谷二關之賞。又在外。後趙免死。滿婦改嫁阿暈。與趙免長子乞炭亥歲相讐殺。數年以來。挾而未甚。今其子溫布漸長。乞炭亥復與相合。而雄心復舉矣。踵趙免之故智。屢爲

其少于毛乞炭擁兵挾賞。夫石塘一路前此所加賞
歲取足于採辦者二千一百餘兩。名爲柴價。半扣軍
資。况可復有加增挾者。日加其誰不挾夷欲無厭。長
此安窮。臣與撫道諸臣計議。薊門有險。可恃寧與相
恃。若能設伏出奇。可收斬獲。卽不然而據險守隘。亦
足堵拒。虜欲挾新我。且停舊相持日久。虜無所利。然
挾○新○傳○舊○四○半○選○臣○若○能○行○之○則○市○賞○之
後操縱可施。羈縻可久。臣等區區之見。所爲疆事久

領必不至于歲增矣

遠計者若此。伏乞勅下兵部覆議上請施行。

請勦奴酋酌議兵食第一疏

勦奴兵食

臣惟兵家之勝在于未戰謂筭當先定也奴酋世受
豢養公然背叛陷我城堡殺我將卒屠戮我人民罪
逆通天神人共憤廷議僉謂當殄滅此虜用振國威
恭奉 明旨曰征勦曰撻伐亦曉然傳布于海內矣
先是臣等會議調兵募兵令用五萬時遼瀋危在旦
夕徵兵于遠無當緩急故止議就近調募爲聯絡防
禦之計云爾今廟議已決計勦伐非倣征播征倭事
例用兵十餘萬欲以示壓卵之勢收覆巢之功猶是
不可幾之數也按朝鮮之役宣大二鎮共挑選馬兵

五千。山西一千。今虜封雖定。爭端未已。西鎮兵馬固未可多撤。一面照前數挑選。一面募補。此額遼左得援兵之助。西鎮無缺伍之虞。或亦可行乎。往者征倭調浙江水兵四千。又召募步兵四千。今征建州水兵無所用之。止調陸兵四千。亦一面召募補足原額。此時汛期將畢。陸續募補。以備明春分布汛地。計未晚也。又往時南直隸狼山兵亦可調用二千。湖廣土兵四千。四川土兵六千。此輩輕剽便捷。登山如飛。以當奴酋步兵。更爲得力。至河南毛葫蘆兵。往曾調數千。

征播此皆應諫調之兵也。又嘗調寧夏鎮城兵一千五百、陝西甘肅三鎮各借五百、而延綏則調入衛兵一千七百。又發銀召募一千三百。今延鎮入衛兵馬先已調發出關、而寧夏陝西甘肅諸鎮在在多事、或未必有兵可借。請照往日延綏募兵之議、各鎮分募若干、併買馬匹、各差慣戰將官統領援遼。錢糧卽於京邊內開銷、亦各鎮纓冠之誼也。畿內八府先已行文召募、河南山東皆近畿地方、亦應分投募兵、每州縣不必拘定名數、但取有勇力技藝者、如此徵募、幾

于海內騷動矣。猶不及五萬之數。至于潢江一帶。礦
徒先徑移書督撫。設法招集。近得督臣汪可受手書
謂已招有數千。此則在前。諫五萬之數者也。督臣又
謂密諭北閔。報有精兵萬人。併移檄朝鮮。亦整兵以
待矣。朝鮮受我卵翼。得保舊封。其圖報當不後于北
閔。用此十餘萬兵馬。豈原諫百萬錢糧所能濟事。大
約行間用一步軍。歲費十金。用一馬軍。歲費二十金。
此尋常防禦之槩也。當此危急之秋。使人冒鋒鏑。蹈

白刃。非有厚糈豐犒。何以得其效力。况安家買馬製

器等費。又在月餉之外。故曰數米而炊。不可以治三軍。倭之役。費至七百八十餘萬。播之役。未及朞年。亦費二百餘萬。而川湖貴三省。民間買馬運米加派私貼之費。又不可數計。此臣待罪楚中時所目擊者也。今遼人能堪此乎。一銖一粒。勢必取給于公家。卽以三百萬計。猶是略約之數耳。蓋當夷虜交訌之時。爲勦滅奴酋之舉。必守者自守。戰者自戰。禦虜者禦虜。勦奴者勦奴。然後兵力不分。而舉事萬全也。調募之兵。旣十餘萬。合以遼東堪戰之兵。大約不下十二三

萬人內以三萬人聯絡東西專備禦虜之用。征勦奴酋者可得十萬人。總領大將非得四五員不可及。查征播八路進兵。用大將六員。副叅二員。征倭水路並進。用大將四員。是以羣力畢効。而收功于一舉。今大將自李如栢外。合再用四員。各隸以叅遊等官六員。而經畧標下另設標兵遊擊二員。此必不可少之官。大將如杜松。劉綎。官秉忠。柴國柱。其選也。似應再起二三員。添註五府僉書。以備推擇。而副叅遊都等官。聽經畧督撫便宜委用。凡遼將素負勇略。曾經戰陣。

廢閒在家者皆可委也其各鎮統領援兵入遼者率多選擇之官亦可酌用也

請勦奴酋酌議兵食第二疏

勦奴兵食

奴酋背逆自干天誅廷臣建議咸謂不殲此小醜無以威示四夷聖怒赫然特下征勦之令臣部職在司戎敢不肅將天威咨籌兵食先議兵五萬餉百萬止是就近調募防捍目前未及于征勦之役也國家舉大事興大役必筭無遺策動不後時然後能一舉而收萬全之功奴酋雖小醜其威力足以吞併

諸夷其才力足以糾連諸虜、鳴鏑控弦之衆、不下五六萬、我兵調募者、卽以一敵一、得失且未可量、况多不習戰之兵乎。臣部續議十萬、併北關朝鮮之兵、亦在數內、實止得八萬耳、先是臣等會議五萬、募兵居其七、今已匝月、遼左召募、尚不滿萬、聞遼人襲時應募者、一隸兵籍、遂同永軍、非甚無聊、誰肯以軍遺子孫、且糧餉不厚、器械不具、亦非所以招徠壯士也。寧前開原聚落本稀、招募故難、廣寧遼陽海蓋三道、若懸令如招家丁之法、豐其糧糈、而不隸于軍籍、按馬

甲仗等項俱官爲製備。勇力技能之夫必有出而應募者矣。旣廣招募。又不得不急徵調。蓋薊保援兵。不過萬餘。加以南京登州兵四千五百。真係快壯六千。止得二萬餘。遼左募兵。見不滿萬。卽再募萬餘。僅得二萬。合之不過四萬人耳。非徵兵南北安所得八萬精兵而用之。兵勢旣盛。然後間諜得行。而北關朝鮮之兵始爲我用也。督臣汪可受貽書于臣。謂招一壯丁。須得安家銀五兩。盔甲器械銀三兩。鞍馬之費。又須十四五兩。而月餉不與焉。計募軍三萬。費亦二十

餘萬矣。調兵安家銀近者三兩、遠者四五兩、各將官家丁亦然。以五六萬人計、又得二十餘萬。先議百萬、今止得見銀六十萬兩。大兵旣集、而糧餉不繼、變且虞。脫巾、何言勦賊哉。寧夏播州役未及募、費各二百餘萬、而民間轉輸不在此數。奴酋蓄謀四十年、帶甲五六萬、東西諸虜互相連結、非若揚酋哮賊突發于一旦、而坐困于孤巢者也。故昔之剿播剿寧夏賊、易而今之勦建夷難。東夷之爲酋長者數十、各擁部落數千、異時王某王元堂仰逞諸奴、猶且奮其螳臂、逆

我願行。今奴酋吞併諸酋盡奪其部落。是皆止一酋之力。而今合數十酋之力也。故昔之剿諸酋易。而今之勦諸酋難。臣非不念多徵兵。則海內騷動。多發餉。則國計空虛。顧上欲爲朝廷伸撻伐之威。下欲爲遼左規一勞永逸之計。不得不摹倣征播征倭故事。指陳其大略如此。乃議餉三百萬。說者謂是書生數米量羹之見也。臣自惟知識黯淺。惴惴俱無能佐軍國大計。度奴雖暫還。勢且復逞。經略既至。而兵餉未集。恐亦難於措手。臣又何辭于不蚤計之罪。

萬矣。豈止三百萬。

此以後至于今日。逆費不下巨萬。可結局乎。

自此以後。至于今日。逆費不下巨萬。

覆議水關事宜疏

看得貴州巡撫張鶴鳴題稱黔蜀土司錯處每遇爭殺軍民受害自水西安堯臣病故遺妻奢社輝幼子安位方在襁褓奢崇明乘機欲爭先世賠償水西地土以隴氏係社輝之母奢崇德奢崇儉係社輝之弟崇明之子奢寅起兵趕殺逐占隴氏崖上崖下地方百里趕逐宗目奢辰母子百姓俱投水西寄住川貴叅將周天祿陰爲左袒要將奢崇明照安國亭事例革去冠帶責令取回隴氏并逃水西百姓仍舊安插

故土兩省委道臣勘定、原立碑界、然後準復崇明冠帶奢寅之惡、神人共憤、應行兩省撫按會勘正罪、輩其襲替云云、又看得四川巡撫饒景暉題稱水西自安國亭以來、垂涎蜀土已非一日、今則誘沙標等假崇德之名、以紊亂宗枝、陰謀爵土、雷安民係劉國用之黨、國用先有立崇明之功、後有弑崇明之謀、被奢寅并其妻孥嬰孩而斃之、安民入水西爲謀主、率兵攻烏箐以致蹂躪夷民、罪將何辭、若夫以賦正西二里、社輝輾轉支吾、供報不一、而誘引沙梯等、混亂宗

枝且言崇德爲効忠嫡派意欲攘取蘭地陰圖襲替
豈知宗圖具在 御前兩姦何愚發此難端乞將各

崇明薄貸奢寅重加劓懲奔社輝并加重治仍行查
照會叅情罪會勘若果係蘭司償地照舊管業若不

係償地數內無論管業久近似應退還云云爲照水

蘭相構各執一方據黔蜀兩撫疏陳顛末詳哉其言

之矣顧黔蜀之處分微有異同則水蘭之紛爭終難

水蘭之年即係黔蜀二撫之年此中起于
拊地兩分之初而極乎以神祖之末年也

結局故自黔撫言奢寅不宜爭正西以賦之地致起

釁端併臚列其諸不法狀而欲革其襲替以及其父

皇明經世編

卷之一

平露堂

士

平露堂

崇明之冠帶如此則社輝之計遂矣其何以服永寧之心自蜀撫言社輝不宜假崇德崇儉之名紊亂宗派以陰闕其爵土而欲將正西以賦二里查非賠償不論管業久近斷歸蘭州如此則奢寅之欲足矣其何以塞水西之口今照兩撫併案臣疏僉謂必須勘明地界以杜後日爭端夫天下無懸斷之事則勘之誠是也但以賦正西之地在水西自社輝始侵占者乎抑自社輝以前安氏所久據者乎在蘭州自崇明始被占者乎抑自崇明以前或賠償或侵奪者乎此

則不待勘而可知者也。倘自社輝近日所侵自崇明
近日被占。則蘭州守土自應還之蘭司。若侵占不自
社輝被占不自崇明。則各令照舊管業。不必以久遠
之事。又開一番爭端。所謂以不治治之者也。奚待勘
哉。若夫崇明承襲宜撫。屢經兩省結勘。撫按會題。欽
依管事。業已多年。奢寅係崇明之子。非奢寅襲替而
誰也。水西卽有移山倒海之手。豈能悖違明旨。自
行廢立。在崇明正不必過爲疑懼。自生枝節。乃亦以
野鬼之女辱社輝。此如市兒相詬。口無擇言。水西各

目亦何用借此挑激以自快其私也。隴氏安氏沙梯沙莪奢辰等併所帶五百餘家幾近二千名口隨住水西終非事體且究竟作何下落應還蘭州安插無疑但奢寅蓄憤既久懷恨日深戎狄豺狼之性能保其不甘心多命乎在社輝誠不必發兵獲送致啓釁端在奢寅亦不得暗害陰謀又釀禍本嚴加禁戢責在四川撫道矣雷安民傳訓等蘭所深讐而水西獨倍加親昵且藏匿寨中意欲何爲無怪乎奢寅得藉爲口實也卽不必獻出蘭州快其睚眦之怒斷不可

仍留水西終爲媒孽之根合聽蜀中提問以撥置之
罪罪之水蘭應各無辭耳

覆議薊鎮事宜疏

看得薊鎮接軫山海于京師爲肘腋之區于遼左爲
唇齒之勢自奴酋發難諸虜生心一切戒備視平時
更當加絃閔臣潘汝楨奉命閱邊躬親巡歷得于地
方耳目之真者具題十事內除助功宜覆另疏題敘
不議外其補練宜速等九事相應列款酌議覆請伏
乞 聖明裁定施行

一曰補練宜速、自遼事告急、薊門兵馬、調發援遼者、先次五千、續又四千、其續調者皆新募兵、原非薊兵之額、而先所調五千、非各標營之選士、則入衛西兵之上駟也、薊兵堪戰者亦自有數、挑去精銳五千、此皆當伍當什之兵、本鎮亦幾于空虛矣、其主兵允宜照額募補、卽頂食援兵名糧、而給贍援兵家口者、于遼東新餉內支銷、則薊餉固未嘗加也、至于西兵入衛者、薊鎮止給行糧、勢有難于募補、今臣部方議撥京營選鋒軍三千餘、分防薊鎮、此不啻足抵西兵之

額矣。東事旣平，援兵撤回，此九標十二路內額軍逃
故者，何月無之，或一二月之前，預爲懸缺以待，固不
難安頓。此數千人也，至于訓練一節，全在演習弓矢
鎗砲等器，舊兵猶不可一日不與器相習，况新兵乎。
允應如議，伏候 聖裁。

一曰戰調宜審，各邊皆以斬級爲功，而薊門獨利用
守何也。非獨迫近陵京，虞于啓釁，地則重山爲限，虜
則錯帳而居，越險以搗巢，豈惟得失難量，抑亦順逆
難分。往戚繼光鎮薊時，兩出塞而兩失利。朝廷亦

置不問至尤繼先紅艸溝之役斬馘三十餘級諸酋
信信而起東協遂歲增賞銀二千餘兩此非已事之
明驗與惟是偵探明而隄防密伺其來犯併力夾擊
大則如昔年棒槌崖之役小則如近年孤山之役皆
所謂漢過不先者也。閼臣禁諸將之出搗而勵之以
迎擊真得以守爲戰之策。薊門瞭望全資南兵每臺
不過四五名何堪復有摘發而不塘一路清旦母子
巢穴甚近年來屢次窺犯而不獲一逞者朱萬良捍
禦之力爲多何可調之東援以自撤其藩衛也。臣部

前疏已明言本官之不可調矣。允應如議。伏候 聖裁。

一曰要地宜防。薊門重山疊障。險固足恃。而當兩山未合。塞水直衝之處。虜騎可以橫馳。如所謂潮河川喜峰口劉家口者。不一而足。水勢洶湧。不可以城或列木柵。或造浮梁。亦旋築旋壞。非獨時調舉盈爲難也。年來修築邊牆。必先衝口。凡兩山斷處。皆築有敵臺。設有火器。爲可夾擊。一切守禦之備。較各處似密。閱臣日擊要害。更爲綢繆之計。正如善護身者。必于

風寒可入之處洵爲長慮。合行申飭該鎮。凡係衝口。可通大舉者。增固城壘。厚集屯戍。多者千人。少者數百。協營標營兵馬。更番貼防。騎射槍砲。時常演習。此則隱然虎豹之勢也。允應如議。伏候 聖裁。

一曰偵探宜明。偵探係軍中耳目。薊鎮舊設有直撥橫撥。皆是役也。直撥夜行晝伏。深入虜穴。察其情形。橫撥沿邊瞭望。遇有聲息。接續飛報。其尖夜皆食雙糧。而另犒以衣鞋之費。所立賞罰格亦甚嚴。年來稍稍異矣。欸貢日久。虜帳漸徙。直撥踪跡不能逃諸屬。

夷。往。往。賚。粟。米。布。之。類。託。處。于。其。帳。內。而。屬。夷。則。韓。以。諸。虜。情。形。語。我。故。虛。實。多。半。其。沿。邊。橫。撥。又。征。習。小。利。或。聚。而。砍。板。木。或。散。而。採。菌。蕈。故。亦。多。爲。賊。夷。所。撲。捉。此。固。細。人。以。身。殉。利。亦。緣。將。領。侵。尅。其。糧。糈。而。賞。罰。不。必。信。也。開。臣。議。以。簡。選。稽。查。責。成。各。道。核。其。探。報。之。虛。實。以。爲。賞。罰。而。臺。兵。烽。軍。亦。按。籍。查。點。中。有。儉。安。離。信。者。併。罪。千。把。總。有。占。役。買。閒。者。併。罪。將。領。懸。令。而。致。行。之。將。領。中。千。把。總。等。自。不。敢。以。苟。且。塞。責。矣。偵。探。寧。有。不。明。而。守。望。寧。有。不。密。者。乎。允。

應如議伏候

聖裁

一日南兵宜恤南兵以臺爲家妻孥俱栖止其上故

總戎在鎮始也當時議者以總戎獨厚南兵言

其守瞭最勤而其食糧亦最厚南營將官率親視之

今觀此疏則南兵定不可裁成總戎之一義爲大也

諸所朘削不饜不止南將之當裁非自今日矣夫四

路臺兵總屬一南將裁一南將而分屬於四路之爲

忝遊爲守提者是昔之苛南兵一而今之苛南兵者

九拒虎進狼之說誠如閔臣言臣待罪密雲時凡南

兵之補額登臺及造糧散糧等項業已屬之該道路

將守提止任稽查不任收革舊時剝削侵漁之弊庶

幾一清至于操臺一節原爲演習鎗砲弓矢等技使
手與器常習而南將多假此爲占役虛冒之實查臺
時有名無人輒以調操爲辭臣在薊門禁南將之調
操止令就近操練或十臺或五臺千把總等官卽其
地而較習焉各定以期日辰時就操申時歸臺則操
調不廢而守瞭無誤閱臣所謂畫地而分操之計日
而時操之蓋此法也允應如議伏候 聖裁

一曰保甲併守沿邊村落星散而居往往爲虜所垂
涎故築堡以衛之而又虞堡民不能自爲捍禦也又

撥軍以防之。然則軍之防堡以爲民也。奈何獨以巡警責之軍。而堡民則終夜安枕。不與聞擊柝之事乎。閔臣議倣保甲之法。令堡民與防軍共編一冊。每夜各輪數名上城巡邏。上山瞭望。有警併力攻打。有功一體旌賞。誠得聯絡軍民。守望相助之意。第村堡離邊遠者或十餘里。近者或數里。從山麓至頂紆迂曲折。尚不下數里。往來巡邏稍屬不便。臣往在薊。會行馬軍帶砲夜巡之法。似與閔臣所議亦相符合。蓋山上原有臺烽。軍兵爲之守瞭矣。而山徑隱伏。有瞭望

所不能及者零虜常得緣徑而入臣嘗令防堡馬軍
每夜輪流十名每更二名各攜一砲巡邏各禁口遇
有警息急放一砲外則臺烽知覺內則堡軍驚醒可
以共相應接而虜聞砲聲亦且抱頭鼠竄矣至于堡
民則令其編立保甲每夜輪流十名亦每更二名周
巡堡城之上此則重門擊柝之意也然非責成有司
則保甲之法不立而同仇之誼不奮如馮家堡民劉
大江等同心禦侮卒保孤壘更宜首加旌賞激勸將
來伏候 聖裁

一曰夷市當防夷市之貿易不獨資其板木之利亦借此以羈縻之也。無奈奸民克換手者。操狙獍之術以愚木夷而罔市利。雖峻法繩之。不少衰止。此啓釁在內爲可虞也。而夷人雜沓口外。皆賣木爲名。安知無奸細之窺探。狡夷之竄發。乘我所不備者乎。此則伏戎在外爲可虞也。閔臣謹潘家桃林二口換手。自遵化遷安二縣民外。不許營充。而又爲之限人。爲之限日。爲之平價。所以防奸恤夷者。爲甚備。潘家口與喜峰口相連。屯戍相望。兵衛頗周。而桃林口僅設一

守備寥寥軍丁不足以示彈壓。臣往與永平道劉澤深議欲移建昌營駐劄其地。今閔臣議以建昌營移居南兵營城內以人馬二分輪守桃林以一分仍在建昌防守冷口允得彼此相顧之意。第建昌營已經督臣議裁併其兵馬于山海鎮右營遊擊則右營遊擊或仍駐劄建昌而分兵以防桃林或移駐南營而分兵以兩防桃林建昌合行該督撫衙門覆議施行伏候 聖裁。

一曰資格宜破武弁一途原不可拘以資格無論遠

昔卽近時名將起自徒步者指不勝屈奈何以世職武科槩海內豪傑之士顧自納級一途多以資進而倖門日開真贋莫辨矯枉者一切禁格之而武健勇猛之夫家非世胄名非武科者遂無由以自進當此邊疆多事之秋閣臣所以有破格用人之議也今後各督撫衙門咨用納級務詳開其履歷功績如所謂以殺賊爲案以戰功爲程者其在腹裏曾經手格劇盜者亦得以殺賊論不得止以對偶數語泛爲摹寫其非內督撫咨用及雖移咨而無經戰殺賊實蹟者

本部槩不推用。如是則免置之士。不以資格拘。而銅臭之徒。不得以冒級進。廣羅網之途。塞鑢刺之竇。事固並行而不悖也。允應如議。伏候 聖裁。

一曰軍力宜養。三軍之所作者氣也。所致者力也。將帥之于士卒。必居平分甘共苦。常鼓其同讐之氣。然後臨事蹈火赴湯。能奮其必死之力。今將官之愛卹軍士者有幾乎。自大帥裨將以至于中千把總等官。遞相攫取。真所謂層層有竇。等等相食。而總出于軍士之脂膏。夫平時痛癢不相關。又從而朘削之。一旦

驅之鋒鏑。冀其奮不顧身。庸可得乎。然禁令非不嚴。
糾舉非不密。而此輩貪冒不止者何也。凡工于漁獵。
者必巧于彌縫。當事者第見其才能捷給。更爲延譽。
則漏網于吞舟。而人皆有倖心矣。各道之于各將官。
營伍事務。一切相閑。隨事查察。未有不得其情實者。
如註債帥以上考。非不明則不公。該道亦無所辭其
責。以此責成該道。不獨可以別將官之白黑。且可以
窺該道之淺深矣。允應如議。伏候 聖裁。

得旨俱依擬行

請勅兵工二部速議修造戰車火器疏

戰器火
車

竊惟京營額設戰車火器不獨以供操演所以備緩急預不虞之用也查得軍營十枝額該戰車一千四百輛自三十六年間已多破壞移文工部先修二百五十輛至今止修完二十輛耳其二百三十輛尚未修造續又破損三百五十九輛因該部前項車輛未經造完臣等與巡視衙門計議權借京營積貯修理營房銀一千九百三十餘兩併拾取舊車木料分委中軍等官周基命等見在修造其餘損折不堪者尚多也又雙輪火車禦虜最得力每具費不過五六兩

邊地嘗用之。營中不當添造平火器鎗砲。原額七萬九百九十二具。內查堪用者止四萬六千餘。近以遼左告急。借發三千六百具。止存堪用者四萬二千餘耳。往有發廠修造者。第加火漆以爲新物。其實皆舊器也。營中操演間有炸裂。職此之由。至如盔甲十萬五千餘頂副。亦十餘年不更製矣。內破壞者一萬八千餘。而選鋒之明盔甲七千頂副。則大半多破壞者也。其帽兒盔紫花甲九千零二十頂副。則什有三破壞者也。此在平時操演。且不足以壯軍容。脫或有事。

此散車朽器、何足以供禦侮之用乎、又內庫所貯銅鑄火器、如滅虜砲、佛郎機之類、略一試用、便卽炸碎。此亦須逐一試驗、另行改造者也。抑戒之詩曰、修爾車馬、弓矢戎兵、用戒戎作、用遏蠻方。夫無事之時、且爲戎作之備、況今遼左之患、漸迫于門庭乎、此事隸工部、日見該部爭執大工錢糧一疏、亦諄諄以修造戰車火器爲言、但工費煩多、尚無成議、伏乞勅下兵工二部、刻日會議、前項器具、應修造者若干、應另造者若干、合用錢糧若干、兵部特選一才幹司官、會同

工部廠司官監督工作而驗視良楮則屬之巡視京
營科道庶官有專責工無冒破至于製造員役務選
巧心慣手之人舊時廠役工拙居半而乾沒成習慎
擇而精覆之是又在監督部臣矣。

覆練火器以壯營伍疏

釋罪將練火器

竊惟中國禦虜長技無如火器故京軍十萬火器手
居其六承平日久人與器不相習弓箭難于見巧火
器易于藏拙于是力不能挽强者皆以火器手自詭
點放多不如法其號爲習者睨視良久火門始燃亦

未必命中也。近委二三中軍千總善此技者，分投教練，以雙鞭激勵之，稍稍肄習。然猶未能成列，其以火器、竹筴、長鎗、短刀什伍相比，兼川迭出，自成一行陣者，無如原任叅將今繫獄張名世之爲工。名世亦自請練成三千人，願當一先鋒。此雖其急于見長，顧其陣法似非塵飯塗羹之具。若以一教什，以什教伯，練成三千，因以將教將，以卒教卒，須之歲月，便可得數萬人，不獨精采改觀，抑且胆氣增壯，無事可恃以建威銷萌，卽有事亦可使連營布陣也。正統乙巳之變，

石亨楊洪皆以重辟繫獄于謙出而用之卒得其力
卽自奴酋發難以來遼弁脫囚服而攝將者如李懷
忠修鶴年輩亦復不少 皇上蓋操不測之權以鼓
舞將吏使人各自致其用何獨于衆所推轂之張名
世而顧靳之也臣亦未敢遽爲因請釋俟其製器練
陣果有成效臣等與巡視二臣共相較閱然後敢以
贖罪請如悠悠無實效仍還其縲紲耳至委兵部司
屬每營二員分隊訓練此尤提綱挈領之言自臣等
揭示營軍更替老弱俱免停糧諸以子弟告替者已

○以○司○官○分○督○各○營○司○馬○得○以○核○其○虛○實○辦○其○才○器

此○並○練○兵○之○要○議○也

不下二千餘人漸替漸多可使營軍盡可精壯但不
教不練而遽使從戎則不盡壯卒之用教練十萬多
軍而倚辦一手一足亦不盡練士者之用臣故拳拳
復申前請摠因遘事告急冀及此時一振京軍之積
懦爾

皇明經世文編卷之終

皇明經世文編卷之四百四十四

華亭

陳子龍臥子 宋徵璧尚木

選輯

徐孚遠闇公 吳培昌坦公

張 岑幼青叅閱

王都諫奏疏

疏

王德完

救荒無奇及時講求以延民命疏

平糴

臣聞古者三年耕則有一年之食九年耕則有三年之食國無九年之蓄曰不足無六年之蓄曰急無三

年之蓄曰國非其國、今天下內外蓄藏、可指而數也、京師漕粟、僅支四年之食、各省倉庾、竟無卒歲之儲、疆家大戶、舊不接新、細氓窶夫、朝不謀夕、歲當豐穰、猶可偷生、一遇凶荒、便填溝壑、昨年四方災沴盛行、蠲賑不遺餘力、然困倒庾竭、莫可誰何、頃以撫臣請賑、饑漕粟二萬石、尚且難之、設有方二三千之災、數年之旱、安所取給、中外廩廩、可爲寒心、臣聞易誠思患預防、書稱先事有備、災荒之年、民多伐桑柘鬻妻子、流亡殍徙、不忍見聞、廟廊之上、宵旰咨嗟、郡邑

之間倉皇跼蹐積貯無素常自懊悔及災傷甫起年

有司視官如傳舍豈能爲三年之計

穀方登上下嬉愉絕口不譚積粟惟倖天災之不至

罔虞荒政之不修其於先事預防之訓何似此臣所

爲歛歔而歎息者也夫穀有貴賤用有輕重惟握其

輕重之權則財可足而民可安管仲曰民有餘則輕

之故人君歛之以輕民不足則重之故人君散之以

重李悝曰糶甚貴傷人甚賤傷農人傷則離散農傷

則國貧善爲國者使人無傷而農益勸此齊之平準

魏之平糴爲富強之根抵積貯之楷模也夫農夫作

苦無間豐凶。歲凶苦穀貴。無錢可買。至豐年始得石粟。則公私督責。交迫一時。又苦穀賤。所售無幾。終歲勤動。轉眼罄空。迨至凶饑。依然餓殍。今年水旱之災。雖有。想豐穰之處必多。臣等愚見。宜及此時。遠體管仲之遺意。講求李悝之良法。令於豐收去處。借支官錢。廣收平糴。隨市價低昂。量增數錢。以勸稼穡。待至歲有饑饉。減價糴賣。以救凶荒。仍令各處修葺常平倉。平廩。一省錢糧。通融支給。各隨州縣之大小。戶口之多寡。爲積粟等差。其斛斗則式。務令較量如一。相

度地方。可窖藏耐久者。扣糴三年之食而止。其南方
地勢下濕。慮有浥爛。稍令出陳易新。在在穀粟有餘。
則災地漕糧可折。如耿壽昌請糴三輔河東東郡穀。
可省關東漕卒過半。陸贄謂一年扣糴之數足當轉
運二年。皆可圓活行之。積貯既贏。伸縮在我。備荒長
策。何以踰斯。或以舊有預備倉。近且建保赤倉。臣等
茲議得無多事乎。賑濟宜惟一在平糴。即行之難。於不知預備一賑而不還。實惠。千石在市。米價自平。此常平之爲上策也。平糴則常
存而不朽。保赤尚勸借而取息。平糴則受糴而無追。
或謂國用甚詘。何從得糴本若干。不知國家發帑金

賑濟可二十萬。則二十萬可四十萬。捐棄不責償。今
糴本暫借。原非棄捐。况賑之後時。雖費無及。備之先
事。雖災不害。其功效又相萬也。或謂法制不善。祇足
害民。查盤問罪。恐添一累。不知戴胃之義倉。朱熹之
社倉。法豈不善。苟非其人。皆足爲缺。然不罪其人而
欲廢其法。是因噎而廢食。見刖而廢履也。舛之甚矣。
若查盤一節。請自今常平倉。勿入大查盤內。止令清
實數。杜侵漁。不許科罰。翻爲民病。則人存而政舉。禁
止則令行矣。然此自內地言之也。乃沿邊事多。兵甲

時興儲峙糧餉，猶爲急務。志曰：雖有湯池百步，石城十仞，而無粟，則莫與守也。邊塞轉運甚難，率三十鍾而致一石，惟召商中鹽納粟，謂之飛輓，言無轉輸之勞，而有芻粟之利也。國朝洪武永樂時，邊商引鹽，一引止輸粟二斗五升，小米不過四斗，商利甚鉅，故耕種甚勤，邊地大墾，倉廩自實。弘治來，尚書葉淇變爲折銀之例，維時粟一石值銀二錢，每引納銀四錢二分，自以八倍之利，後至七錢五分，又以爲十二倍之利，而不知邊地從此荒蕪，米價因之騰踴，倏遭旱魃。

銀四五兩始買粟一石。於是有米珠之憂。師旅一行糧不繼。乃發帑金十萬糶買。又無所得粟。於是有脫巾之患矣。今鹽商墾田納粟之例。不能遽復。宜準平糶之法行之。耿壽昌常平初制。只令邊郡皆築倉。賤糶貴糶。宋真宗內出銀三十萬。付河北經度貿易軍糧。今宜畧放其意。預發九邊年例銀兩。趁時豐熟。召之。今則墾田者得利。田功益修。不特平糶之法也。買糧料。不拘豆麥穀粟。盡數收糶。約邊軍十萬。一年糧餉。扣用一百二十萬石。各量兵馬數目。多積預儲。及至支放之時。查照豐凶。兼支本折糶之豐年。則二

石而有三石之餘糶之凶年則六石而有十石之用夷虜不能爲之困水旱不能爲之災豈非治兵理餉安邊足用之善經乎然此非臣始言之而始行之也臣考萬曆十五年以司農宋纁言發南京戶部庫銀二十五萬兩臨德二十四萬於陝西河南山東山西直隸減糶矣十六年又以司農言動支餘剩糶本義勸香稅銀兩收買二麥矣十七年以按臣徐申言動支贓罰銀一萬四千五百發近畿糶且令各處撫按照例行矣十八年以經畧鄭洛言發糶本八萬四千

三百餘兩於陝西召買糧料矣二十年又以郎中李
甲言發臨清倉折糧銀十萬兩於大同糴買矣然或
以災祲而行或以農穰而止或以募兵而作或以變
泮而輟或暫行於近畿而未通行於外地或請於一
塞而未遍及於九邊以故欲糴則無銀欲糴則無米
愍茲宿疾未試良方犬豕厭人之食而不知收郊野
委人之骨而不知發帝閣有叩能不惻然臣等伏讀
皇上節次綸音不曰儲穀備荒地方要務則曰豐年
召買糧料甚爲得計不曰近來各地方官平時不以

備荒爲意，一遇災傷，賑救無策，則曰凶荒旣稱，無米可糴，及查豐收，又不趁時糴買，所幹何事？大哉王言，軫恤民隱，痾瘵在躬，獨照顏風，肺肝如見，而年來實効未臻。皇仁未著者，則以法不定也。伏乞勅下

戶部，平糴舊法，一應輕重歛散，出納裒益事宜，轉行各省直邊鎮督撫司道等官，悉心商確，擘畫科條，斷於邊腹咸宜，農人兩便，開具上請。俟宸衷裁定，頒布施行。其有守令奉行不効者，令撫按官不時論劾，督撫監司不恤民艱者，許臣等兩衙門指名叅奏，則

上意所嚮風動景從倉廩未有不充盈糧芻未有不
豐贍內地未有不康乂邊陲未有不阜安者也臣等
款款之愚如此惟皇上采納幸甚

四川異常困苦乞賜特恩以救倒懸疏

採木權使征播

臣惟川中有大苦一曰大木之苦採木初傲有云招
商採買大木無與小民聖明愛養元元意誠篤至
顧勢有不能者蓋大木不產于中土而產于夷巢猥
竄巉巖復潤之區仰若登天俯如墮井尋採則扳躋
險惡拽運則履蹈艱難固非一官一吏所能荷肩亦

非十人百人所能負載者。客商無多。則以土商代領。
大戶有禁。則以義民殊稱。其實皆民也。夫民既同。不
得不派以木夫。木價既少。不得不折以夫價。其實皆
取之民也。督木之令。急如星火。民何敢漫于上供。染
指之條。畏如畧罪。官亦不敢擅于科歛。欲求遠嫌。遠
謗。聽其私議。而夫工食有派。至八九金者。有多至十
四五金者。吏胥因而漁獵。奸猾肆其誅求。時蓋雞犬
靡寧。追呼相望者。木夫就道。子婦啼號。畏死貪生。如
赴湯火。黔寧二敝。尤屬濱夷。獨是黎朽。全爲窄地。索

橋競渡節至淪亡夷落勒錢半爲焚劫洗河既費過

建昌馬湖之木乘木始下每託言神助云

渡更難若非水漲龍行定是百年難出且嵐烟瘴地

面房一觸輒僵溝壑委填道途暴露屍流水塞積骨

成山其偷生而回者又皆黃疽臃腫之夫畧似人形

半登鬼錄矣以一縣計木夫灰亡約近一千則合省

亡夫不下十萬木夫工銀每縣約近二萬則合省夫

銀不下二百萬既以剝民脂膏又以戕民壽命遐邇

痛哭扼腕撫心故曰採辦之苦此一也一日權使之

苦國家征商有要地抽稅有專責近來各省直添

設稅務中官。若魚鱗然。網益密矣。以川省言。定稅銀三萬兩。每州縣量派各數百金有差。自市井塲鎮絲布米鹽食店酒沽。下及菜傭草履。無不有稅。間架過唐青苗踰宋錙銖盡筭。額課始充。州縣解諸藩司。藩司解稅府。稅府進于朝廷。此定額也。外有濱江衝要州縣二十餘處。則太監私委私抽。又在額進之外。數較益多。蓋太監丘乘雲住坐會省。各處遣稅官猶一人。而稅官又旁招無籍各數十人。布爲牙爪。此輩益大神廟時往往游變。涼可鑒戒。豈皆奉公守法。惟欲暴斂橫征。每商至呼衆齊登。逐

籠開盤任情攫取稍不如意輒加以嚴刑畧不快心必中之奇禍憑凌城社莫敢誰何出沒鼠偷豈能自饜然皇上之稅十之二三而稅官之取則十之八九奪遠商之鳬鰕濟羣小之狼貪皇上亦何利焉且商人自蘇州許墅常州鎮江上清河湖口天寧洲城磯伍家缺團豐白羅山武昌荊州夷陵新灘巴東二十餘稅入蜀來巫山奉節萬縣盈盈咫尺更稅三番上度重慶合州閬中瀘州叙州嘉定新津流等處無不有征一舟而經三十餘關一貨而抽三十餘次

商人不惟斂其息利。且折其母錢。咸疾首而不樂江
湖。吞聲而不通貨賄。記曰。易關市。來商旅。語曰。竭澤
而漁。後必無魚。臣懼商旅不來。而澤魚必竭。故曰。權
稅之苦。此又其一也。三曰。大兵之苦。播酋謀逆。罪惡
滔天。破我綦江。殛我將帥。屠城若肆。殺人如麻。山塹
屍填。河流血赤。纍纍白骨。浮蔽瞿塘。一時惴恐。全省
艱飢。皇上赫然震怒。特置督臣。調邊腹雄兵五十
萬。分道齊驅。擒斬疊報。釜魚穴鼠。殲殄有期。然川民
亦大荼毒矣。兵馬經過。人民逃竄。廬舍盡燬。村落無



烟、渝州一帶、魂定于驚惶之後、命甦于垂死之餘、聚散靡常、悲喜乍別、有田地荒蕪、而耕種無力者、有青苗盼望、而蹂躪無存者、啼饑號寒、殆甚于戊己歲、災北自保順、東自夔梁、兵將一臨、騎馬輒至數百匹、歸農里甲、復攝在官、有騎馬一站、而餽銀至二三兩者、有官馬一頭、而帑銀至四五兩者、兵所不至之處、則調馬各數十匹、協濟彫疲軍站、省會衝衢、而骨立難支、倒暗塞路、居行蓋兩困矣。兵興以來、銅鐵軍器、粟芻烘炒、布綿絮桌衣甲線麻、以至豆料火藥等項、

無不需于民間、官價雖多、民累豈少、至運米缺役、病更甚焉、每夫一名、約運餉米三斗、募民非銀兩不行、一縣夫約三千名、則夫價不下萬兩、丁糧每石貼銀二兩、一縣丁糧約萬石、則貼銀不下二萬兩、一縣如此、百縣可知、然此猶曰費若等之財耳、前松坎運餉回夫、出山夜喊、我兵誤以爲賊、而截殺者無筭、近者南川餉夫、入近金紫、懼賊復發而殺者三千、賊衆旋亦殲斬、然我餉缺乏、死者已無生矣、故曰征討之苦、此又其一也、夫是三苦者、偶值其一、民猶得以撐持、

皇明經世編

王有訓奏疏
卷之一

程本相使臣據

十

平露堂

連遭其二、民已難于疲命、今廼三番迭見、真是十室九空、而蜀土之民、猶不至爲變者、則以歲事尚幸豐稔也、又以逆酋可旦暮平也、脫有二三年之旱、則救死不暇、使計官儲、歲額難供、豈遑額外、又倘有曠日經年之師、則馬力旣竭、豈可伏鞭、心肉已剗、那堪再割、臣想此民、惟有鬻妻賣子、苟延逃竄耳、倘又乳哺之不加、蠶食之無已、則物窮必反、事久變生、臣恐勝廣猖狂、鄢藍煽動、國家之患、不在播而在民矣、播酋猖獗、方借我爲名、而我魚肉窮民、爲之毆逐、則外呼

內應決裂難收。近聞蜀中突報。威州玉壘隕崩。山流水湧。松潘地維頻震。合江天鼓雷鳴。酋長孟董塞入境殺人。土司馬應龍聲言內犯。人妖物怪。大可寒心。皇上西顧掛懷。能無動念。又惟川省庫積久號豐盈。而近漸消耗。大木之銀可三百萬多。郡縣派加而庫發者止十有二。征播之費可四百萬。除欽發內帑。索價南滇。借資留都。尚不足者十之五。近且檄下各郡縣搜括庫貯無碍羨餘。悉解布政司充軍餉。而府庫在在告空矣。又各郡縣義倉社倉及常平預備倉廩。

處處告匱矣。其在民間，每丁糧一石，雜項重料率加
往年五倍。今又每石加銀一錢二分，隨竭皮空，銀將
安出？而倉穀之發，又散民間，易以鮮員，加以升斗賄
累甚多，舊穀更起新糧，每糧一石，預征米以十之七。
禾稼未登，催科已逼，糊口尚缺，揭稅難支，而民間又
在在告竭矣。倘或猝有水旱盜賊之災，則給發用銀，
而守藏無銀可給，周賑用穀，而有司無穀可周，勸借
用民，而小民無餘可借，祇令封疆之臣，搖手頓足，莫
可爲策，則進退安得不狼狽？戰守安得不貼危？此其

憂不在民而且貽之國矣伏願 皇上軫念川中用
兵之苦不異貴州貴州稅務中官業已寢停未遣引
領恩覃一視遠將四川原差太監撤回京師即各遍
野沿江之稅一切報罷蠶叢黎庶喁喁慶更生萬一
聖意難于盡罷擇其川江地衝聚去處會撫按委官
征取靳足原額以佐軍需其餘偏僻地方不係商賈
輳集者禁止勿權至三殿大木懇將舊蓄榱桷構造
以壯 皇居俟播平十餘年後瘡痍旣起元氣旣充
方興採木之役仍着令動支庫貯不派民間即派民

間亦必給商採買。萬勿驅民深入就死。如向日人財兩空。則四川赤子。枯骨復生。倒懸立解。無不雀躍呼賀。聖明邊鄙無虞。而廊廟有濟。臣不勝待命之至。

國計日詘。邊餉歲增。乞籌畫以裕經費疏

裕糧贊

此疏在萬曆二十一年九邊頗安。而年例日增。稅貢日進。而國用愈絀。言之可謂痛切。

臣惟軍國之務。稱重大者。惟邊餉。而軍國之需。稱浩繁者。亦惟邊餉。方今邊餉匱詘極矣。在鎮臣按額而呼。尤有額外之呼。在計臣按時而應。尤有不時之應。呼者至急。應者至艱。呼者愈頻。應者愈窘。何內外相違若是。豈祖宗朝固已然耶。臣考開國之初。及嘉

靖之季其所爲經制繁簡有若天淵迥絕者國朝自
洪永以來原無年例年例自正統始薊保密昌原不
稱邊稱邊自嘉靖始臣請縷析言之宣府歲額不過
五萬兩今主客餉銀不下二十九萬有奇大同原額
亦止五萬兩今不下四十五萬有奇山西原額不過
二萬兩今不下二十萬六千有奇遼初不過一萬兩
嘉靖時增至二十萬三千今不下六十萬有奇薊鎮
初不過一萬五千兩嘉靖時增至七十三萬今不下
一百二十四萬有奇延綏初不過一十萬兩嘉靖時

增至二十一萬。今不下三十六萬有奇。其在甘固等鎮。或增八九萬。四五萬。此眇少者也。總計弘正間。各邊年例。大約四十三萬而止。在嘉靖則二百七十餘萬。業已七倍。至今日。則三百八十餘萬。且十倍之竭九州之財力。而不足以供。括百年之蓄藏。而難乎其繼。撫今追昔。能不寒心。然臣伏而思之。我祖宗朝土田賦稅。非有加於今也。乃事不煩而自足。今甲兵戰馬。大不逮於昔矣。乃例歲加而難支。其故何也。蓋祖宗朝寓兵於屯。且耕且守。有備無患。此趙充國金

城之遺蹟也。自屯田之法堙。則經界隱沒而難明。屯丁消索而賠苦。人皆逋逃。地爲陷穽。戎馬財賦。遂分兩塗。祖宗朝中鹽於邊。納粟於倉。有飛輓之利。而無轉輸之勞。此晁錯實塞之遺意也。折銀之說出。則金錢盡入於太倉。枵腹咸仰於內帑。脂膏益竭。芻粟愈難。米珠草桂。可爲扼腕。數十年來。謀臣策士。滿目嘔心。思復屯鹽之舊者。至諄切矣。然藁莽之區。竟無畔岸。開荒之報。多是虛文。逐末之輩。率憚耕耘。開墾之譚。卒成畫餅。生財有道。舍此何由。將裁冗費以濟

時艱。則十九年之汰革方行。而二十年之恩綸已降。近檢督撫諸奏。薊鎮議裁四萬二千。旋增五萬七千矣。山西裁二千四百。旋增二千六百矣。宣府裁二萬八千。旋增四萬五千矣。大同裁二萬一千五百。旋增二萬三千八百矣。即數鎮而他鎮可推也。將事撙括。以補決裂。則三秦延綏。閩海。滇池。處處議留。紛紛請發。即如數目。章奏延綏請補年例五萬九千矣。兩廣請畱存貯一十五萬矣。應天請畱潁。野。關。稅。及奉例三萬三千矣。鳳陽請歲發兵餉四萬七千矣。即數省

而他省可知也。減者幾何。增者未已。欲與不可。欲取

不能。展轉思維。束手無策。惟有節儉一語。可爲救時

急務耳。蓋以利言則外甚微。而內甚鉅。以蠹言則外

易剔。而內難祛。一有請乞。即係數百金。偶有乾沒。動

關數十萬。自非宸衷天啓。真見歲餉之艱難。憂深國

計之困促。則城社可憑。齒馬有忌。誰能洗百年之積

蠹。而一清之。昔漢文帝惜露臺百金之費。而海內富

庶。豈百金富漢室。而其樽節者。皆百金類也。唐玄宗

侈瓊林大盈之積。而海內虛耗。豈瓊林能耗唐家。而

其窮奢者皆瓊林數也。臣願皇上以漢文爲法。以唐玄爲鑒。畱神區畫。隨事稽查。如某爲急缺之用。應儲某爲不急之務。應汰某爲額外之徵。應省某爲格外之求。應免某爲有益之物。應貢某爲無益之玩。應蠲某爲先朝之舊。應遵某爲末世之實。應塞觸類引伸。漸次省減。而又屯田。鹽法。注意責成。選賢任能。共圖幹濟。有可耕之地。則勿以煩苛奪之。有可耕之人。則勿以科歛驅之。減斗頭以溥皇仁。懲侵尅以恤民隱。苟可墾田積粟。何問內外兩商。僅能薄賦輕徭。不

拘新舊二額。隴畝有勸相之方。無徒道委之府。府委之衛。鷄犬絕追呼之擾。以使近者皆悅。遠者皆來。一切阜財通商。容民畜衆。諸良法務與督撫諸臣實心振舉。則以萬壑爲阡陌。以大冶爲鑪錘。元氣不洩於鉞鏑。泉源不涸於尾閭。行觀上下俱足。邊腹咸充。不憂帑竭藏空。庶可久安長治。軍國幸甚。臣愚幸甚。

目擊東倭釁隙專備禦疏

備禦東倭

臣惟倭奴封貢一節。關係社稷安危。在廷諸臣。無慮數十人。皆力言其不可。臣謂即此可寢謀矣。頃接總

督顧養謙一疏，知表文將至，事在垂成，然止言求封，不及貢市，又言倭戶盡逐，始可議封，臣以謂總督或自有的據，及接朝鮮王李昫賊情疏，則又謂倭賊向來屯聚劫掠，蓋房築城，轉運軍糧，絕無歸計，說和說貢，眩惑軍情，向背胡然，頓殊若此。昨因本兵石星集臺省諸臣于射所，會議東事，臣得讀本兵覆疏稿，則謂一封之外，似無他事，又謂不許粘帶貢市，致日後不靜，又謂撫按查核釜山倭戶一人未歸，不得許封，大都與總督符合，臣以爲本兵或自有主見，及叩其

所以茫如捉影捕風臣問外傳總督貽書有貢市禁絕能以身任等語信然否本兵曰難必倘強索貢市只革其封號便是臣等又問釜山倭戶肯盡數歸巢否本兵曰難必臣等又問特遣遼東巡按親至釜山查看倭戶有無歸去可行否本兵曰不可由此言之則倭之封而不貢也倭之去而不畱也毫無足憑何能輕信臣又覽本兵覆疏開六月內晉州搶殺等情先該經畧奏報十一月內慶州搶殺天兵二百二十三名搶殺軍糧八百餘石等語一一不差又謂朝鮮

疏在去年十二月初七日之前，總督疏則今年正月二十日之後，故論倭情頗異。然相隔止一月上。下豈至叛服霄壤？臣又覽叅軍官葉靖國稟帖，稱正月初四日釜山倭夷尚有一千人，金海龍川熊川等處行長所居，或止二千人。倭衆正在睥睨，奈何言去。則朝鮮疏稱三月進搶上國，風汛要犯大明等語，豈必盡虛？臣又覽沈惟敬答倭書有曰：「既許爾乞降封貢，如何因循不至，則封貢已兼言之矣。」臣又覽倭國抄白副表一道有曰：「比照舊例，蓋謂國朝封貢例也。」未又

曰永獻海邦之貢則明白直言。諸臣佯若不知。殊爲悖盭。臣又覽行長答沈惟敬書有和親字樣。且以媒和之。旣而飾辨兩國相好。即是和親。然倭奴狡詐。豈不識相好二字。臣又覽朝鮮陪臣金晬與總督顧養謙稟帖。稱倭瞰大軍。不能久處。則繼之以必不可聽之說。播在人耳。而難以口道。竊未知媒和者。悉以此聞于朝廷否。則惟敬許倭。不止貢市。何謂一封即可了事。興言及此。令人髮上指。夫倭奴興兵朝鮮。原欲入犯中國。許儀初寄書內地云。關白欲上取北京。

稱帝大唐又云善詐和假降以破敵國即遐邇市井

是時經畧爲宋應昌

之人且有先知矣經畧東征豈不辨此平壤克捷亦

已奏功無奈碧蹄大敗魄散膽破乃始悚心堅意惟

封貢是圖不復言戰鬪事矣然猶畏人知不以上聞

及遼東撫按趙燿周維翰相繼奏報俱云封貢已成

知難掩蔽乃始直言其故開城王京陪臣王子悉以

封貢取效旋見羣議沸騰則又時露時藏或專言封

而插言貢以少殺公憤厥後知事勢已遂始明言請

封大航三年一貢行長小船年年通貢贊畫主事劉

黃裳則直請委官至對馬島收查貢物許闕浙遼東
大賈通市舶矣本兵亦左袒其說而重違明旨乃
行總督勘議總督以機局已就莫可說和而惧有煩
言止云請封絕口不及貢事乃本兵亦云對馬島開
貢誠爲不可惟是封議不得不從夫名器難假繁纓
當惜今以關白篡弒而錫之王封以號召三十六島
未服之豪傑是虎而翼也安見其可然使倭之欲而
果止於封也使倭稽首就封而不復要貢市也使倭
要封之後鼠竄海濱而不復鯨吞華夏也則假虛名

而省寔費結與國而令支邦以財力困疲之狀戎馬
瘡痍之候罷兵息戰休士撫民未爲非策顧倭欲無
厭夷信難終封之與貢猶形影也景之與填猶循環
也假令本兵總督陰予而陽奪之先請封號借明
旨以箝廷臣之口繼請貢市快目前以貽日後之患
則禍在作俑是謂欺君二臣何忍爲此假令秀吉行
長陰叛而陽服之愜然受封以示我之不備則患在
噬臍是謂悞國二臣豈忍蹈之我朝鄭端簡日本考
謂倭夷奸譎自恃勘合方物戎器滿載而來遇官兵

矯云入貢見我無備則掩襲邊境正統中大嵩挑諸
嘗被其害世廟時蔓延浙直江淮間流毒更慘今
若大釁復啓覆轍將尋是沈惟敬誤經畧經畧誤總
督總督誤本兵本兵誤皇上也無論旦夕可弭弛
擔息肩即要領不保于丘園斧鑕伏誅于簡冊臣竊
懼焉夫犬羊喜怒難期桑土綢繆貴預今本兵曰倭
得封即颺去不我犯也臣曰倭即犯胡以卒應本兵
曰吾與總督巡撫三人當之臣曰何足當此三人即
捐軀其如二祖八宗之神器何臣曰遼左戰士

有幾、本兵曰、不過二千有零、臣曰、二千之卒、何足禦數萬之倭、本兵曰、戶部糧餉無措、去年遼東巡撫請召募家丁三千人、竟裁減八百有零、臣曰、帑藏誠匱、然邊陲危急、何論惜財哉、諸臣曰、吳惟忠駱尚志、南兵當暫留遼左、不宜速撤、本兵曰、業已先奔、臣曰、是所稱鬼形者、難再用耳、諸臣曰、即有急、朝鮮難出援、不若於旅順口、鴨綠江、緊要險隘、增兵戍守、本兵曰、多則乏餉、增五千可足用、諸臣曰、劉綎兵撤回、亦要留住遼左、本兵曰、川兵難久、不如募土著、倭虜皆可

捷伐相與咨嗟嘆息沿海邊防豈不數四申飭然核
諸文移之上則色色皆有求諸戰陣之間則件件成
空遠左對敵尚且無兵內地承平豈能禦寇如以羸
卒而搏猛虎譬則寡子而角孟賁豈不欲所向無前
寔則恐力之不足今不羞賄虜備倭而急爲之防乃
爭誇畏威悔罪而張以爲功三尺童子知其不然而
乃以蒙睿智聰明首出百王之聖主此臣所爲扼
腕而拊心者也昔越王勾踐一小國君耳患吳之强
也而苦心焦思置薪于坐臥即仰膳飲食亦必嘗膽

卒乃撫循士民、訓練兵甲、發習流三千、教士四萬人、君子六千人、諸御千人、伐吳遂以殲敵、今堂堂天朝、豈比蕞爾西越、誠肯赫然震怒、練將練兵、懲虎責實、當事諸臣、臥薪嘗膽、矢畫陳謀、某鎮可用若干兵、必人人有投石超距之氣、某鎮可用若干將、必個個有斬將搴旗之功、某鎮可用若干糧、必在在有士飽馬騰之慶、見兔而急顧犬、亡羊而即補牢、則習流何止二千、教士奚啻四萬、除克雪恥、操縱隨宜、苟玩愒歲時、如處堂燕雀、幸火未然、喻媮以爲安、則延寇入

室養虎遺患、令外夷酋長廝役、從旁竊笑、此議之所不敢辱也、

稽財用匱竭之源、酌營造緩急之務、以光聖德、

以濟時艱疏

節財六事

臣聞天子富有四海、琛獻萬邦、衆民廣土、無改於前、而帑竭藏空、大殊於昔者、何也、蓋歲入僅四百萬、而歲出輒至四百五十萬有奇、居常無事、已稱出浮於入、年來意外之警、不時之需、皆因事旋加、舊額未有如寧夏用兵、甫數閱月、約費餉銀一百八十七萬八

是時府庫充盈三

皇明經世編

大征之費皆取給于

卷之一

三

三

平露堂

千餘兩。朝鮮用兵首尾七年。約費餉銀五百八十二萬二千餘兩。又地畝米豆援兵等餉。約費銀二百餘萬兩。平播之師。未及朞年。約費餉銀一百二十一萬六千餘兩。連川中湊辦。共約二百萬三千餘兩。婚禮珠寶等項。約估銀九百三十四萬三千餘兩。婚禮傳造袍服四萬一千餘疋。約料銀八十餘萬兩。坐派改造十八萬三千餘疋。約工料銀一百四十餘萬兩。山西潞紬續織四千七百餘疋。婚禮傳買段一萬二千七百餘疋。共約費十餘萬兩。磁器節傳二十三萬五

千件。約費銀二十萬兩。挑三山口趙家園等處。約費銀二十四萬餘兩。而各省直災傷拖欠段價料銀一百二十四萬五千餘兩。又欠厨料銀九萬六千餘兩。夫此數十萬數百萬者。積而筭之。亦既二千六百餘萬矣。假使藏之府庫。而無所屑越。安得而不殷富。然洩之尾閭。而無所停涵。安得而不匱空。當帑空之時。而講濟虛之策。惟有節之一字。最爲緊要。古稱能節雖虛必盈。况非虛乎。不節雖盈必虛。况非盈乎。臣請以六事籌焉。一曰減織造。以拯民命。工部題稱浙江

諸款源中此時弊政

袍服二萬六千餘疋，該工料銀六十餘萬兩，內扣畱
該省解部錢糧，至三十三年止，僅得十萬餘兩，議將
前數三分出辦，該省應二十萬兩，戶部應
十六萬兩，工部應二十四萬兩，奉 聖旨，這織造錢
糧，你部裏再議處來看，欽此。夫太倉之積儲，懸罄浙
西之杼柚，俱空。袂蒙之人，豈能荷百斤力竭之馬，胡
能馳千里，束手坐視，莫可爲畫。夫文稱卑服，禹美惡
衣。高皇后躬補緝之袞，文皇帝御澣濯之服，今
綺繡纂組，積筥盈箱，服御不親，安所用此。至於羊絨

細精爲秦塞膏肓之疾，瓷器巧奇，貽洪都心腹之殃。疲瘼奚堪，痼瘵均憫，故織造不可不減也。二日止營，建以贍邊儲，蓋各邊年例爰給軍需，據部題二十七
八年春夏已題無可發者，若薊永昌易則四十六萬
兩，山西宣大則四十七萬兩，遼延甘固則四十九萬
兩，而秋冬未題者，又復一百三十餘萬兩，九邊之貌
貅，枵腹四海之蒼赤倒懸，即今多方節省，猶措注難
前，若使到處虛糜，則波流何極？方今仁智之殿未畢，
南城之役未終，玄殿之藻如雲，龍舟之急如火，而尤

欲效長夜之燕遊。構冲天之樓閣。不惟材木耗盡。且致儲蓄置空。倘有脫巾。其何以應。昔太祖謂官興作必度量再四而後爲。又謂隙地營建。忽恐勞民傷財而即止。玉音如在。儉德宜遵。此營建不可不止也。三曰趣大工以省煩費。蓋軋清等宮部發銀一百十三萬兩。戶兵二部協濟六十萬兩。又據工部處給其約二百數十萬。而楠杉巨材。出累朝所藏。內帑所貯者。不與焉。夫工之未完也。即費數百萬而不爲多。工之旣成也。即費數百金而亦可惜。查工匠常至三四

千人夫役常至六七百人。工匠一日七分則一月幾千餘金矣。役一日五分則一月七百餘金矣。臣待罪該科。隨閣部諸臣縱觀兩宮並美。已極壯麗輝煌。然六月間猶見砌石有不輟之斤。鐫棟梁有方新之丹。漆至七月後則油彩虛而有待。門戶闐而無人矣。夫皇上父天母地。不端拱于乾清之宮。而令坐視銷金。遂皆竄于日居月諸之久。暴殄天物。糜爛民膏。故大工宜速也。四曰停珠寶。以垂燕翼。據戶部揭稱進過珠寶約價銀一百三十九萬六千三百餘兩。未曾召

買尚該價銀七百九十四萬五千餘兩。吉典伊邇催督甚嚴，而賠累何辜，無米難炊。昔宋太祖碎水晶之漏，高皇帝壞鏤金之牀，楚書不寶金玉而寶善人。皇祖謂珠玉非寶，節儉是寶。今貧商如履陷穽，部府如坐鍼氈。人命懸絲，國儲若洗，豈以九州萬國之慶典，至爲剝膚起髓之梯航？翹首皇帝，亟需德音，大賜蠲免，否則減十分之五，或乃減三分之一。近可援珠行鋪戶遠可訓聖子神孫，此珠寶所當停也。五日審採辦以濟國用，蓋四川採木原派楠杉木枋五

千六百根塊計銀可三百五十萬兩湖廣原派五千五百六十根塊計可二百一十萬三千兩貴州原派二千七百九十餘根塊計銀可九十六萬八百餘兩四川兩運得十分之六查得庫發銀止三十六萬四千四百兩餘皆索之蜀民也湖廣頭運得十分之四庫發銀止一萬八千五百餘皆索之黔民也今三運未完之木尚欲剗肉脫骨乃三殿未採之材何繇塗膏鬻血必須早爲計處豈可重困疲民則採辦當審也六日發內帑以採燃眉蓋礦稅之設原爲助工而

金花之加。足用停止。今據各監進過礦銀四十八萬五千餘兩。礦金二千三百餘兩。各項稅課并加罰等銀。共二百五十六萬二千六百餘兩。積誠多矣。又萬曆六年。奉 旨取金花銀每年加二十萬兩。迄今二十二年。納四百四十萬。蓄誠厚矣。以 皇上萬國九州之財。充萬國九州之用。宸居皇木。國寶邊儲。特發非常。俯仰咸裕。昔唐德宗置瓊林大盈二庫。以爲天子私藏。唐臣陸贄力諫。謂宜散小儲而成大儲。舍小寶而成大寶。乞 皇上陋德宗之鄙見。採陸贄之儻

言則泉流而澤通財散而民聚故內帑不可不彑也

披瀝赤心恭請篤厚中宮以光聖德疏

請養願中宮

是時戚臣鄭國泰疏請

皇太子先冠婚授冊立為科部所糾公遂上此疏廷杖

臣惟大學論治國平天下必始於齊家班固以夫嬪

一百為民

之際為人道之大端匡衡以配匹為民之始萬福之
原皆至論也故天子之與后猶天之與地日之與月
陽之與陰父之與母也地與天並位天不交地則乾
坤毀矣月與日並明日不麗月則晝夜息矣陰與陽
並行陽不順陰則寒暑愆矣母與父並配父不顧母
則家道索矣今皇上萬國之父也中宮萬國之

母也。皇上聰明天縱，仁愛性生，其眷禮中宮，夙稱優渥。乃臣自入京數月以來，道路喧傳，咸謂中宮役使止得數人，憂鬱數親藥餌，且貼危不自保。臣驚惶痛惋不勝。宮禁深嚴，虛寔未審。臣即愚昧，竊知其不然。第臺諫之官職，得以風聞言事。果中宮之不得於皇上，萬一有憂鬱歟，則子於父母之怒，猶得以號泣幾諫。矧中宮爲萬國母，安得隱忍不言，以傷斃癸倫。果皇上之眷顧中宮，有加無替歟。子於父母之謗，具得昭雪辨明。矧皇上爲萬國父。

安得蒙蔽不言以虧損盛德。兩者躊躇無一而可數
日間食不下咽寢不帖席蓋天地陰陽之大變宗廟
社稷之隱憂滿朝大小臣工無一人不聞無一人不
駭而無一人敢言蓋以全軀自保與忠君愛國之念
交相戰而不自勝也臣疋羸之骨不足以嘗播楚枯
朽之株不足以當雷霆然所恃者高皇帝在天之
靈且羨漢史袁盎卻坐事耳太祖高皇帝冊立

皇后冊曰天眷我明啓運興王爲君爲后可不慎歟
君以仁政慎於治外撫黎庶而統萬邦后以懿德慎

於治內表六宮而母天下長久之道也欽此臣以長久之道爲皇上披陳即罹鈇鉞之誅亦可見太祖高皇帝於地下矣漢史載漢文帝所幸慎夫人在禁中嘗與皇后同席坐及幸上林布席袁盎引卻慎夫人夫人怒文帝亦怒盎因前說曰臣聞尊卑有序則上下和今已立后夫人豈可與同席哉且陛下獨不見人疏乎漢文悅語慎夫人賜盎金五十斤臣疎賤不得出入禁中何敢比袁盎之卻坐然得致皇上眷顧中宮止輦虛受媼美漢文即歿且不朽

臣不識忌諱冒犯天威不任席藁戰兢待命之至

皇明經世文編卷之終

皇明經世文編

王都諫奏疏

請養病官

元

平露堂